

《新武虫打虎》

羅穗麟

第一幕：酒館

演員：武虫，西門慶

武虫：喂，西門慶，你今期好出位喎！聽聞你又識到個新女朋友喎，係真唔係呀？幾時介紹一、兩個畀我識呀？哈哈……

西門慶：你又會知道嘅？！你啲消息都幾靈通喎！我收得咁密實都畀你知道。你係得嘅。

武虫：哼哼……西周刊在手，天下事無留！（武虫舉起手中雜誌）你咁都唔知？你咁爛滾又咁鬼有錢，緊係有大把狗仔隊跟你搵食啦！哈哈……不過你老豆又真係幾絕喎，連自己個仔啲料都唔放過，真係夠晒公私分明喎！哈哈……哈哈……（西門慶緊握手中酒杯，面紅耳赤）算罷啦西門，呢啲又唔係咩醜事，你又何必咁耿耿於懷呢？追女仔咋嘛，冇乜大不了的啫，不知有幾多好似你咁嘅風流才子出嚟風花雪月啦！（西門慶略為寬容）不過我就真係估唔到你原來鐘意煲老藕囉。哈哈……哈哈……哈哈……（西門慶轉趨激動）

西門慶：你有冇搞錯呀！咁大個人都唔用腦嘅，周刊寫乜，你就信乜，係人都知道啲八卦雜誌鐘意吹水 ga 啦。我以為只有啲無知婦孺先會信八卦雜誌講嘅嘢，估唔到你幾十歲人啲思想都係咁幼稚 ga！仲有呀，好心你就搵返份工啦，成日游手好閒咁，次次返工都做唔夠一個月就辭職，成日嫌三嫌四，又話份工冇前途，又話老闆刻薄。最仆街嘅就係次次出嚟食飯都冇錢畀，仲要次次都係我……（西門慶尚未說完）

武虫：夠喇，講夠喇！你又好得我好多咩？二世祖！（武虫憤而離開）

西門慶：喂，喂……咪走呀，你仲未畀錢呀！

第二幕：酒館

演員：武虫，掌櫃，伙計

武虫：哼！真係激死我呀喇！嗰個西門慶恃住自己有幾個臭錢就狗眼看人低，好彩我都唔蠢得晒，屈咗佢一餐飯。不過，可惜我仲未飲夠。（邊走邊說）咦，前面有間酒館喎，好！入去再飲過！

伙記：客官，請問幾多位呀？

武虫：乜你介見到有其他人咩？

伙記：哦，係嘅係嘅，咁請問客官你想要啲咩呢？

武虫：你同我攞你哋店入面最好嘅女兒紅畀我，有幾多我要幾多，再要五斤牛肉，快！

伙記：係嘅客官。

武虫：喂！乜咁鬼耐 ga？係咪驚我有錢畀呀？

伙記：客官酒嚟喇。

武虫：（喝一口後立即吐出）嘩！你呢啲咩酒嚟 ga？咁淡嘅！係咪溝咗水 ga？

掌櫃：客官，冇理由 ga 喎，呢啲係我哋店入面最好嘅陳年女兒紅嚟 ga！絕對冇溝水 ga！

武記：咁嘅酒邊係人飲 ga！唉，不過睇見你哋間酒館咁踱奄，都唔慌會有靚酒 ga 喇。算啦。喂，啲牛肉得未呀？你想餓死我呀？

掌櫃：得得得！好快到，客官請稍等。

伙記：五香牛肉到。

武虫：（吃一口後立即吐出）嘩！冇冇搞錯呀！你哋啲酒已經淡過水 ga 啦，估唔到連啲牛肉都咁難食嘅！又老又韌，邊係人食 ga？

掌櫃：客官，我哋小店小本經營，請你將就下啦。

武虫：唉，算我今日當黑喇，走啦走啦。（片刻，武虫飲至酩酊大醉，伏於酒桌上）

伙記：客官，我哋打烊喇，請你結咗帳先啦。

武虫：唔好搞我，我仲未飲完。

伙記：掌櫃，嗰個客官飲醉咗又唔肯結帳呀，點算呀？

掌櫃：咁我哋唯有喺佢身上搵啦！（掌櫃與伙記合力於武虫身上搜尋銀兩）

伙記：掌櫃，搵極都搵唔到喎，點算呀？

掌櫃：豈有此理！冇錢仲學人叫咁多嘢，仲要嫌三嫌四，我一定要好好教訓佢！你哋同我打鑊佢，打完之後掉佢去景陽岡餵老虎！（眾伙記衝出圍毆武虫）

第三幕：景陽岡

演員：武虫，記者，老虎

（武虫被眾人毒打後被棄於景陽岡上）

（片刻後，武虫醉醒）

武虫：咦？呢道係邊道嚟 ga？點解我會喺呢道 ga？我明明飲緊酒 ga 喎。哎呀！我隻腳呀！哎呀！我隻手呀！哎呀！我個頭呀！點解我會周身都瘀晒 ga？我係咪發緊夢呀？哎呀！真係好痛呀！我唔係發夢呀！呢道咁黑嘅？阿媽呀，救命呀，我好驚呀！（武虫邊叫邊走，摸黑下山，不久遇見一發光物）咦，前面有兩點發緊光嘅嘢，係咩嚟呢？唔通係燈光？呢次有救喇！（武虫向發光物前進）

老虎：（咆哮）

武虫：嘩！救命呀！係老虎呀！（武虫高呼狂奔，老虎窮追）

（另一方面，記者正在山上守候）

記者：唉，都唔知邊個仆街放流料，又話咩獨家消息，乜鬼嘢西門公子與豪門怨婦景陽岡上打野戰！打你條命咩！鬼影都有隻，今次又聽食白果啦！唉，宜家做狗仔隊真係難，人工又丕，工時又長，仲人見人憎，畀人鬧我哋吹水唔攞嘴，咩報導失實，冇專業操守。哼，真係服鬼咗啲人，係咁清高就唔好買八卦雜誌睇啦，咁我就唔使搵料搵得咁辛苦，正正常常咁搵下新聞。

武虫：救命呀！有老虎呀！有冇人救我呀？

記者：咦，嗰邊好似有人嗌救命喎！唔通係西門慶畀豪門怨婦 SM 緊？哈，咁就真係大新聞喇，今期實賣斷市都得喇，年尾花紅有著落喇！

武虫：救命呀！救我呀！老虎食人呀！

記者：吓！乜原來係有人畀老虎追咋！等我仲以為係西門慶……

武虫：喂，救我呀，救我呀……

（記者沒有理會，只站在一邊，武虫不斷逃跑，結果老虎跌入獵人陷阱斃命）

武虫：嘎，嘎，嘎……終於都有事喇！真係福大命大，執返身彩！你個仆街，你係咪人嚟 ga！我嗌得咁大聲你理都唔理下我，見死不救，企埋一邊睇戲！？

記者：哦！咁就死咗喇！唉，我仲諗住有獨家猛料，景陽岡老虎咬死人全程大披露，今次真係要食白果喇。

武虫：嘩！你個仆街原來一早就想我死嘅，我咁都唔打鑊你，我就唔叫武虫！

（記者突然靈光一閃狀）

記者：咪住！我有計喇！喂，你想唔想做英雄？想唔想一夜成名，萬人景仰？想就聽我講啦。

武虫：做英雄？萬人景仰？好呀，好呀……點呀，點呀？講過我聽下。

記者：我有一條好橋，可以一家便宜兩家著，你可以成為萬人景仰嘅英雄，而我呢又可以交到差擺花紅。

武虫：咁你仲唔快啲講！

記者：慢慢嚟啦，唔使急。喺，宜家隻老虎係咪死咗呀？

武虫：係呀。

記者：隻老虎死咗嘅事又有咩人知呀？

武虫：我同你囉！

記者：哈哈……咁咪係囉，你明唔明呀？

武虫：乜你阿媽生得你咁鬼死蠢 ga！咁都唔明！喺，宜家隻老虎死咗淨係得你同我知，咁我哋話隻老虎點死其他人都信 ga 啦！

武虫：咁又點呀？

記者：你有冇蠢得咁緊要呀？我係做咩 ga？

武虫：記者囉。

記者：錯！正確嚟講我係做狗……

武虫：你做狗？

記者：我係做狗仔隊呀！白痴！咁你又知唔知狗仔隊最叻係做呀？

武虫：吹水囉！

記者：咁咪就係囉，我可以話隻老虎係你打死嘅，咁你咪可以做到打虎英雄，而我又有新聞寫囉！

武虫：係喎！你真係聰明呀！你唔單只聰明呀，仲好鬼死好人呀！真係好多謝你呀！係呢，請問兄台點稱呼呀？

記者：叫我竇柏仁，人人都叫我偷拍人嘅，有咩大新聞記得通知我呀。（即寫下聯絡電話與武虫）唔好講咁多喇，喲，你宜家就企定定，我叫你做咩就做咩，叫你擺咩 pose 就擺咩 pose ！

武虫：係！知道！

（武虫聽記者指示做出各種動作，記者將其打虎動作一一拍下）

第四幕：市集

演員：武虫，縣官，報販，師奶，路人

報販：號外呀，號外呀……獨家猛料呀！打虎英雄武虫夜擒猛虎呀！打虎過程獨家大披露！

群眾：畀一份我，畀一份我……（路人爭相搶購）

西門慶：唔該畀一份我。

報販：唔好意思，賣晒喇。

西門慶：啊……嗰個武虫發咗咩癲呢？平日軟手軟腳咁，畀人打都唔敢還手 ga 啲，一晚之隔就做咗打虎英雄，一定事有蹊蹺。

路人：喂，你哋睇下嗰道，武虫呀！

群眾：嘩！係武虫呀！

（武虫立即被群眾包圍）

路人：武虫，幫我簽個名吖。

群眾：我又要，我又要……

武虫：好，好……唔使急，唔使急，你哋排好隊先啦，慢慢嚟……

肥女子：武虫！我好鐘意你 ga！（突然，人群中有一肥女子衝出，強吻武虫）

武虫：呢位小姐你，冷靜啲啦！（武虫勉為其難接受其吻並苦笑）

（突然，大批師奶湧至並索吻）

師奶們：我又要，我又要……

武虫：（武虫人急智生）嘩！你哋睇下個邊，UFO 呀！

（眾人望向武虫所指之處，武虫乘機逃走）

師奶們：弊喇！武虫走咗呀，快啲追啦！（眾人緊追武虫）

（燈光一轉，正直舉行加許儀式）

縣官：今日我喺呢度有一件事要向大家宣報，就係為患已久嘅老虎已經被消除喇！（歡呼聲四起）而為大家消滅虎患嘅人就係武虫。（歡呼聲更大）我今日喺呢道嘅目的就係要頒授英勇市民獎畀武虫，同埋邀請武虫成為我地縣嘅治安糾察隊隊長，我哋有請武虫上台接受呢個榮譽。（群眾高呼武虫名字）

武虫：我武虫好多謝大家嘅支持，我身為大家嘅一份子，為百姓出一分力係好應該嘅，正所謂人人為我，我為人人，我哋大家係好應該互相幫助嘅。同時，我亦好榮幸可以成為治安糾察隊嘅隊長，我武虫喺道向大家承諾，日後定必為廣大市民效命，整頓縣內嘅治安，請各位日後多多關照。（武虫言畢即掌聲雷動）

第五幕：武大郎家

演員：武虫，武大郎，潘金蓮，三姑，六婆

武大郎：金蓮，你煮整好隻雞未呀？

潘金蓮：嚟喇，就得喇。

武大郎：快少少啦，阿虫就返嚟喇，細佬佢最鐘意食雞 ga。

（屋外突傳來喧鬧聲）

武大郎：出面咁嘈嘅？唔知發生咩事呢？

（門外正是武虫被人群包圍索取簽名）

鄰居三姑：嘩！阿虫仔大個仔囉，真係越大越靚仔呀。

鄰居六婆：係囉，係囉，佢細細個嗰陣我已經話佢係叻仔嚟 ga 啦。

武大郎：阿虫，你終於都返嚟喇！

武虫：哈哈……大哥，好耐冇見喇！

武大郎：阿虫，你快啲入嚟啦，你阿嫂煮咗好多好餸等你返嚟食飯呀。

武虫：吓！咩話？大哥，冇見幾年啫，乜你已經結咗婚喇？

武大郎：係呀，阿虫，自從你畀阿爸趕走之後屋企就發生咗好多事喇，你入嚟我哋再慢慢講啦。

（一踏入屋內，武虫一見潘金蓮即被其美色所吸引）

武虫：呢位係……

武大郎：阿虫，呢個就係你阿嫂喇。阿蓮，呢個就係我個細佬喇。

潘金蓮：金蓮有禮。

武虫：武虫有禮。

武大郎：哈哈……阿虫你做咩咁見外呀，大家一家人唔使咁拘謹啫。

武虫：呀，係嘅，阿嫂你叫我阿虫得喇，以後就有勞你多多關照喇。

潘金蓮：二弟你言重喇。

武大郎：哈哈……真係咁鬼客氣 ga，以後你有咩事就吩咐阿蓮去做啦。哈哈……阿虫，自從你走咗之後屋企就好耐都有咁熱鬧過喇，可惜阿爸同阿媽佢哋兩位老人家福薄，冇機會見到阿虫你出人投地。只怪當日阿爸誤以為你偷咗佢嘅家傳之寶，將你趕走，我哋一家人就有機會再喺埋一齊喇。唉……

（武虫默不作聲，此時屋內一片寂靜）

武大郎：哈哈……今日係阿虫你衣錦還鄉嘅大喜之日，大哥我真係唔啱呀，竟然又再舊事重提。嚟嚟嚟……大哥敬你一杯，祝阿虫你以後平步青雲，前程似錦。

武虫：好！大哥，細佬都敬你一杯，祝你嘅燒餅生意蒸蒸日上，生意興隆。

（飯後兩人皆飲之大醉）

潘金蓮：相公呀，你哋醉喇，唔好飲喇。

武大郎：我有醉呀，我不知幾清醒，我只不過有啲眼瞓之嘛，你幫我照顧下阿虫啦，你睇下佢個貓樣，醉到不醒人事咁喇。你幫我扶佢入房休息啦。

潘金蓮：好啦，呢道就等我嚟執拾啦，聽朝早相公你仲要一早出去賣燒餅 ga，你就先返房休息啦。

武大郎：咁好啦，我瞓先喇。

（武大郎回房休息，潘金蓮則攙扶武虫回房間）

潘金蓮：二弟，喺道瞓好易冷親 ga，我扶你入房休息啦。

武虫：唔該你呀大嫂。

（潘金蓮扶武虫回房時被武虫非禮）

潘金蓮：二弟！你做咩呀？請你尊重啲啲。

武虫：嘻嘻……大嫂，你又使乜怕羞呀，大哥份人咁鬼木獨，人又生得樣衰，又肥又矮，我都唔明你點解會嫁畀佢 ga，我估佢平時都滿足唔到你 ga 啦，不如就等我嚟滿足下你啦，好唔好？

（潘金蓮立即給武虫攞了一記耳光，並返回自己房間將武虫非禮之事告之大郎）

潘金蓮：相公，武虫佢非禮我呀。

武大郎：吓，唔會嘅，佢飲醉咗唔小心 ga 啫，你唔好咁小心眼啦。

潘金蓮：唔係呀，佢仲講你壞話呀。

武大郎：我同阿虫手足情深，佢又點會咁做呀，況且我做事光明磊落，又點會有壞話畀人講呀，一定係誤會，係誤會，你唔好諗咁多喇，早啲休息啦。

第六幕：市集

演員：武虫，生果店主，少女，路人甲，路人乙，路人丙

（翌日早上，武虫與其部下到市集巡視，後走至一生果檔前）

武虫：喂，老闆，生意點呀？多唔多人幫呀？（武虫隨手拿起一蘋果咀嚼）

店主：過得去咁啦……（店主望著武虫手上蘋果）

武虫：哦，咁有冇人嚟搗亂呀？

店主：咁就有。

武虫：嗯，咁就得喇！好，我哋去第二道巡下。

店主：喂，喂，喂，咪走住呀，你食完個蘋果未畀錢呀。

武虫：吓！？你叫我畀錢？畀咩錢呀？

店主：一個富士紅蘋果，盛惠五蚊吖。你唔好側側膊唔多覺呀，我報官拉你 ga！

武虫：哼，真係好笑喇，竟然夠膽問我收錢，你知唔知我係邊個呀？

店主：我識你係老鼠呀！

武虫：我你都唔識！？（店主搖搖頭，一副不屑的樣子）好，我宜家就話你知，我就係你要報嘅官喇，我係新上任嘅治安糾察隊隊長。你知唔知點解你可以咁安樂咁喺道做生意呀？都係全靠我喺道維持治安咋，我咁辛苦做嘢，食你一個蘋果啫，你都好意思問我收錢？（武虫說罷即離開）

店主：冇冇搞錯呀，咁分明係搶啫。（店主一臉無奈，目送武虫離開）

（武虫與部下在街上流連，在街上與上一少女並上前搭訕）

武虫：喂，靚女，買化妝品呀？（少女點頭點應）你叫咩名呀？我叫武虫呀，係新嚟嘅糾察隊隊長呀，不如大家做個朋友吖。（少女搖搖頭）你鐘意邊樣呀？我買畀你吖。

少女：不必喇，多謝。

武虫：你唔使同我客氣啫。（武虫乘機搭著少女肩膀）

少女：你做咩呀？

武虫：冇嘢，想同你做個朋友咁啫。

少女：非禮呀！（途人立即圍觀，並指點著武虫）

路人甲：喂，嗰個男人係乜水呀？

路人乙：哦，呢個咪就係新嚟嘅糾察隊隊長囉。

路人甲：吓！就係佢喇？聽人講佢係打虎英雄嚟 **ga** 啫，點解會做埋晒啲咁嘅嘢 **ga**！

路人乙：係啦，真係估唔到打虎英雄都會做啲咁有傷風化嘅嘢 **ga**！

路人丙：唔單只咁呀，我啱啱仲見到佢食完嘢唔畀錢呀。

路人甲：唉，咁就慘喇，有個咁嘅人嚟道，我哋呢道以後都唔使旨意會有太平日子喇。

路人丙：係呀，最近聽聞又有老虎出沒呀，今次真係冇太平日子過喇。

第七幕：武大郎家

演員：武虫，武大郎，潘金蓮，西門慶，記者

（某日早上，武大郎與潘金蓮在家中吃早餐）

武大郎：金蓮呀，你今朝有冇見過阿虫呀？

潘金蓮：冇喎，我估佢又係同佢啲朋友出咗去飲酒呀。

武大郎：唉，呢個細佬真係越嚟越唔似樣呀，晚晚都出去飲酒飲到天光先返嚟，又成日唔返工。

潘金蓮：相公，你都係唔好咁擔心喇，二弟佢都咁大個人啦，佢識得點樣照顧自己 ga 喇。

武大郎：唉，就係因為佢咁大個人都唔識諗，我先至擔心呀。阿虫佢以前細個嗰陣都唔係咁 ga，點知到佢越大就越唔生性，做咗打虎英雄就以為佢已經變乖咗啦，點知做咗英雄就令佢變得更加氣焰。

潘金蓮：算啦，相公，你都係唔好諗咁多喇，你已經盡咗你為人兄長嘅責任啦，佢唔聽你講，都係佢自己嘅問題，唔怪得你 ga。

武大郎：（武大郎點點頭表示同意）嗯，我都夠鐘出去賣燒餅喇，你一個人喺屋企小心啲呀，如果阿虫返咗嚟，你就同我好好咁照顧佢啦。（武大郎話畢即離開）

潘金蓮：相公好行呀。

（武大郎離家不久，武虫就回到家中）

潘金蓮：二弟，你成身酒氣，你又去咗飲酒呀？

武虫：嘻嘻……好，我哋繼續飲（武虫喝醉，說話語無倫次）

潘金蓮：二弟，你醉喇，等我扶你入房休息啦。（潘金蓮扶武虫回房間）

武虫：我先冇醉呀，我宜家老虎都可以打低幾隻呀！

（潘金蓮安置武虫於床上後，欲離開之時被武虫緊握其手）

武虫：我要打死你呢隻大老虎。

潘金蓮：二弟，你醉喇！（潘金蓮用力推開武虫，惜力有不逮）

武虫：我要打死你！（武虫將潘金蓮拉倒於床上）

潘金蓮：二弟，你想點呀？

武虫：哼哼……我要你死，我要令你欲仙欲死，哈哈……哈哈……

潘金蓮：二弟，唔好呀，你醒下啦，我係你大嫂嚟 ga！（潘金蓮不斷掙扎）

（此時，武大郎回到家中）

武大郎：哈哈……我真係大懵呀，連個鑊鏟都唔記得拎，金蓮呀，你拎隻鑊鏟畀我吖。（沒有回應）金蓮！（仍然沒人回應）奇怪喇，金蓮佢一朝早就唔見咗人嘅？（房間內傳出聲音）咦，房入面好似有人啲，唔通金蓮佢入咗去？（武大郎步入房內，嚇見武虫淫行）阿……阿虫你……你係道做咩呀？（武虫完全忽視武大郎的存在）

潘金蓮：相……相公，救我呀！

武大郎：阿虫！停手呀！（武虫仍然沒有理會武大郎）我叫你停手呀！你聽唔聽到呀？（武虫變本加厲欲脫去潘金蓮衣服，武大郎拿起花瓶欲擊武虫，武虫及時閃避，武大郎反被花瓶擊中斃命）

潘金蓮：救命呀！大郎你有冇事呀？你應下我啦！救命呀！武虫殺人呀，武虫殺咗人呀！

武虫：唔好嘈呀……我叫你唔好嘈呀！（武虫用手掩住潘金蓮口鼻以阻止潘金蓮

呼叫，但因用力過度令潘金蓮窒息致死）

（剛巧西門慶至其家，欲追回武虫所欠之債）

西門慶：喂，有冇人呀？開門呀，有冇人呀？咦，隻門原冇閤 ga，（西門慶遂走進屋內，嚇見武大郎與潘金蓮二人屍體）嘩！武虫，你……你……你點解要咁做呀？佢哋同你有咩仇呀？佢哋點死 ga？

武虫：畀你見到晒，冇辦法啦，咁我唯有連你都殺埋啦！（武虫手拿粗繩）

西門慶：我咩……咩都睇……睇唔到呀，我咁……咁啱路過 ga 咋，冇咩事喇我走先喇，拜拜！

武虫：想走？冇咁易！（武虫立即擋著西門慶去路）

西門慶：救……救命呀！我求……求下你放咗我啦，阿虫，我哋話晒都朋友一場吖，你……你放過我啦，最多你欠我的錢我唔再追啦，好唔好？

武虫：哼，我先冇咁蠢呀！（武虫二話不說將西門慶勒死）

（武虫為掩飾其殺人罪狀致電記者竇柏仁，欲利用其為他歪曲真相）

武虫：喂，柏仁，有新聞呀，你快啲嚟啦！

（片刻，記者趕至）

記者：嘩！咩料呀？！滅門慘案呀！你想我點幫你寫呀？

武虫：你幫下我啦，你實得嘅！

記者：搞成咁你叫我點幫你呀？不如我將個事實寫出嚟啦！哈哈……

武虫：你幫定唔幫呀？（武虫目露兇光）

記者：幫……幫……幫，你等我慢慢諗下先啦，（記者苦思一會後，突然靈光一閃）呀！有喇！

武虫：點呀，點呀？（記者遂與武虫竊竊私語）好！好！好！

第八幕：市集

演員：武虫，報販，路人，村長，村民

報販：獨家猛料呀！打虎英雄武虫夜討殺兄淫魔！事件來龍去脈獨家大披露！

路人甲：喂，你有冇睇今期貳周刊呀？

路人乙：有呀，真係估唔到西門慶係啲咁嘅人嚟 ga！

路人甲：係啦，今次武虫真係好嘢呀，不單只發現到潘金蓮同西門慶嘅姦情，仲將西門慶呢個淫賊正法，為武大郎報仇，真係大快人心呀！

路人丙：喂，大件事喇，大件事喇！

路人乙：咩事，咁緊張呀？

路人丙：老虎咬死人呀！

路人甲：咩話？！又有老虎出沒呀？！

路人乙：哦，我以為咩事咁緊張，老虎之嘛，你唔記得我哋呢道嘅糾察隊隊長武虫係打虎英雄嚟咩？

眾人：係喎！咁就一於請武虫幫我地去打呢隻大老虎啦！

（老虎食人事件傳出後，村民聚集於祠堂共商打虎大計）

村長：各位，宜家虎患嚴重，山中經常有老虎出沒，近日先有一名上山斬柴嘅村

民被山中猛虎所殺。虎患一日未除，本村村民嘅生計及安全都不保，所以

今日我就係召集大家嚟共商滅虎對策。唔知各位有咩意見咁呢？

（村長發言後，村民們議論紛紛）

村民甲：不如我哋組織一隊打虎隊，一齊上山打老虎啦。

村民乙：好呀！召集全村所有壯丁一齊上山！

村民丙：仲有呀，一家要搵武虫呀，佢係有名嘅打虎英雄，講到打老虎佢就最有經驗喇！

眾人：係呀！一於就搵武虫做打虎隊隊長啦！

村長：好，好，好！既然大家都一致認為武虫係打虎嘅最佳人選，咁我就任命

武虫你做打虎隊隊長啦。

武虫：呀，呀……武虫我何得何能呀？（武虫面有難色）

眾人：一於咁話啦武虫，你唔做仲有邊個可以做呀？

武虫：咁，咁……我唯有聽候大家差遣啦！

村長：好，好，好……既然武虫肯應承，咁我哋又何愁老虎不滅呀？咁我就決定

打虎隊嚟明日中午出發啦！

眾人：好！

第九幕：金山

演員：武虫，村民，記者，老虎

（眾人已齊集於有老虎出沒的金山山腳之下）

武虫：好！今日大家聚集於此，誓要將猛虎滅！

眾人：好！

武虫：你哋各人都要聽我嘅指揮。

眾人：係！

武虫：好，宜家我哋有三十一人，咁就每三人分成一隊啦，而我就自己一人行事，你哋有冇咩唔明呀？

眾人：冇！

武虫：好！咁宜家開始就各隊分頭行事啦，一遇到老虎就通知其他隊伍！

眾人：明白！

（眾隊伍分散後，武虫獨自一人在山上）

武虫：哼哼……終於都使開晒啲人喇，我先冇咁蠢擺條命出嚟搏呀！哈哈……等我搵返個好位置，瞓返個晏覺先！

（武虫找到一林草濃密處，悠然躺下午睡，未幾老虎出現）

老虎：吼……（老虎一掌踏在武虫胸膛，武虫赫然驚醒）

武虫：救命呀！！

（武虫大叫一聲後，老虎立時將仔咬死）

眾人：喂！嗰邊好似有人啞救命呀，快啲過去睇下啦！

（此時，記者竇柏仁亦在山中出現）

記者：聽聞金山成喺啲公子哥兒今期嘅偷情熱點，等我山長水遠咁走嚟呢道，唉，點知又食白果，真係激死我呀！

眾人：喂，快啲過去啦，有人嗌救命呀！

記者：咦，做乜事咁多人嘅？（記者隨村民趕至武虫被殺地點）

村民甲：武……武虫佢死咗呀！

村民乙：嘩！連武虫都畀老虎咬死，咁我哋點算呀？

村民丙：我哋唔可以就咁就退縮 ga！為咗同武虫報仇，我哋一定要捉到隻老虎！

眾人：好！

記者：哈哈……估唔到我又黑唔晒喎，咁都畀我搵到新聞。唉，武老弟，你都算

唔好彩喇，唔識打老虎都要嚟充大頭鬼，不過臨死都可以畀我做下題材，

你都算死得有價值喇！

（結果眾人合力將老虎消滅，武虫屍體亦被運回村中）

第十幕：祠堂

演員：

報販：號外呀，號外呀！打虎英雄壯烈犧牲呀！

群眾：畀一份我，畀一份我……（路人爭相搶購）

路人甲：唉，真係可惜呀，一代打虎英雄最終都被猛虎所殺。

路人乙：唉，係啦，真係聞者傷心呀。

（由於武虫之死被傳媒所誇大，武虫獲得最高榮譽的規格舉殯）

（眾人齊集於武虫的喪禮）

村長：武虫生前致力於維持本村治安，除暴安良，熱心公益，又先後去除虎患，去除淫賊，實在係我哋各位嘅典範，日前武虫為咗我哋，又再上山打虎，可惜最終命喪於猛虎之下，為咗紀念武虫嘅英勇事跡，本村一致決定在本村祠堂建立紀念碑給本村村民弔唁，在此我哋一齊為武虫嘅死默哀……

完